

四庫全書

集部

欽定四庫全書

集部
秋澗集卷十二至
四

詳校官侍讀學士臣沈威熙

侍讀臣孫球覆勘

總校官降調編修臣倉聖脈

校對官助教臣汪錫魁

騰錄監生臣汪騰蛟

欽定四庫全書

秋澗集卷十二

元 王暉 撰

五言律詩

壽史開府

開府羣公表山河間氣鍾飛翻同儷景婉孌獨從龍慶
會千年連中原百戰功一門傳畫戟列聖錫彤弓霖雨
思賢久中朝注望隆詔居華衮地德邁古人風學並征

南癖心肩尚父忠翦鱸清碧海煉石補蒼穹脫畧三朝
雋從容萬石恭都俞明治體風俗變時雍薦達多名士
經綸極至公功成心轉小量廓孰非容柱石嘉謨壯朝
廷睿眷崇何心貪寵數圖報罄丹衷降典維公共羣疑
可適從欽承能致恤度作貴惟中漢紀三章約秋荼一
掃空與時弼五教致主冠三宗壽席恩光老梅梢蠟蒂
融翠梧雛鳳秀燕寢霧香濃毫彩知神相顏酖匪酒紅
武公強不息羅結懿而聰袖手調伊鼎刊名溢景鐘耆

英追洛會遐壽等喬松賤子何多幸凡金久在銘寸誠
片擬獻五福日來藪德潤餘燕桂簪纓滿漢宮一杯干
歲酒遐邇此心同

壽徒單顛軒

間氣無時歇先生嶽降申慶流椒室裔袖有鴨江春漢
苑稱多士青雲早致身縱橫蘇氏學英特賈生倫盛德
應如此文章固有神玉堂看步武滄海忽揚塵飄泊心
逾壯歸來道日新因懷盤谷隱怡悅太行雲歟命竹林

駕來陪楚醴賓詞源窮造化講席見經綸小子嗟何述
先生樂育諄顧非清廟器時辱郢人斤既佩雕鐫厚長
懷頌禱勤微誠方獻炙誕節遇茲辰酌以義泉水清冷
勝飲醇贈以湘纍菊馨香如友人水澄性不撓菊老氣
彌振道體同康謚窮途任屈伸年年華表底同拜白頭
親

送外弟韓茂卿北上

外弟韓從愿奉檄轉補尚書部掾自梁過衛留三日

而去臨行求言為訓因書是詩以贈

華省開新制尚書右六曹官嚴程有限吏職最為勞受
簡聯鳧行隨時覆契刀論量天下事承接眼中豪吾弟
方強仕頭顱未二毛荷囊初佩服公務久薰陶未害居
煩劇休辭任動慄一勤無不辦多慢豈難操所事先懷
慎當官貴可逃古人淹典制多暇戒遊遨簿領雖山積
身心樂戰鏖苦辛天不負聲實日能高况汝韓宗盛從
來衆士髦華纓影繡弁象簡映青袍光祿何稠疊司空

見贈褒非儒即政務致力釣溟鰲繼述無多闕公清善
吏毫老夫雖潦倒聽汝鶴鳴臯

春夜宴史右相宅

勲閥汾陽業金貂漢相家陽春元有脚玉度瑩無瑕神
駿推宛馬跳梁笑井蛙相逢成夜集暢飲厭流霞綺席
圍聲妓銀箏合鳳琶晚妝添粉黛雜舞見渝巴爐暖融
螺甲盤香供露芽透空敲雨杖促節摻漁樵侑食增陽
盛紓懷發興賒舊聲今漸遠新體此無加樓轉三更月

燈垂半夜花歌長縈曲調師猛奮須牙辭謝寧容退留
連暫樂佳直須窮薄伎尤異是雄躋登踏寒林判軒呈
迓鼓了侍筵更紀僕歸燭黯籠紗下客陪簪玉清吟擁
鼻瓜嗣侯非自樂先業念無涯待士無疎密籌邊靜謔
詳有時陳樂籍張宴為賓嘉此夕真儀鳳明朝等散鴉
寵光需北闕春禴動南衙豈特調銀字重看拜白麻轉
頭雖契濶後話足雄誇碧草傷淹賦清江弔屈沙別懷
增惓惓獨雁謾啞啞霄漢嗟垂翼庭階愧倚葭情悠天

共遠心在地無遐會作登樓客聊停泛斗槎朱門三十
載未分鬢空華

送表弟韓雲卿赴臺

才幹稱吾弟名行邁友生煙霄須致力蘭署久留情練
事言無詎臨機敵莫勅趨朝元有日去魯不無名榮映
荷囊紫聲嚴柏府清外司歆簡潔內憲惜紛更輕重量
時制銓除慮旦評責人無自恕乘勢可將迎息權非逾
出覲情怨自平斯言當首議大體先居貞行已雖多轍

開心罄赤誠諒能持衆美不必論前程自笑行藏拙
看歲月驚清時悲杜舍白壁愧虞卿遊宦幾三紀殘棋
任一枰鐘鳴宜少息時戾尚何營塵委慚芻狗歌長振
孺纓十年希勇觸一旦謾葵傾道在吾何慊憂深汝備
明見渠由爾達著眼在茲行聽作章徒紊行難累匪輕
南山與秋色依舊兩崢嶸

謁武惠魯公林墓

金馭成陰朽山東自古疆限田標鎮戍積憤致搶攘武

惠當年傑天心霸業匡雲龍時際會風虎日翱翔五十
連城重三千戰士良一朝歸版籍遺愛在耕桑甫定先
文治來威戒伐張儉恭希大帛號令肅秋霜氣革耒鋤
擾風還禮義鄉頌方歌魯盛人駭隕星鐘雲出青崖頂
烏瞻泰岱傍驅車經鵲里故宅似汾陽山倚祁連冢祠
荒綠野堂門旌虛將幄燕寢尚清香有客追疇昔懷人
動慨慷王師初破汴河朔久淪網文物隨雲散招徠不
一亡盡收周禮樂重闢漢科場清秩銓華省羣英萃郡

庠有金皆冶器無玉不追章蓄德需明主流波及四方
星躔從落落奎彩獨煌煌嗣相圖光紹先猷在益彰雪
山宜久重世業寢丕昌帝道開中統皇風煽八荒重推
黃閣相輕是尚書郎兩署分荷橐千官列雁行至今稱
濟濟所在見蹒蹒原治無多術推賢用叵量措材真得
所收效儘非常侯國能如此朝家化更皇闡明雖實理
勉勵乏明揚一代徐通議中流號巨防試圖援手助潛
有跋胡妨薄宦新過魯諸生懼面牆泮田饒樂育師授

奈無望可惜絃歌地虛成苟在梁力扶雖切切事迫去
遑遑量分功名薄傷時涕泗滂野煙知客恨先自柏城

蒼

靈巖寺二十六韻

中土論名刹茲山第一巖地靈連海岱境勝隔仙凡紺
殿通虛閣丹崖間翠嵐天低神寶嶺佛出證明龕雞警
陰魔暴僧馴怒虎眈定師興寺始党刻不辭慙石狀殷
公怪眉厖老衲甃鐘聲盤絕壑幡影走枯柵法護雙羅

樹經嚴七寶玉巢棲松鶴楮茗淪露泉甘化雨濛沙界
巖圍抱碧潭布金仍趙魏仰食不耕蠶富覽山無盡幽
尋力不堪微官嗟縛律小隱欲投簪吟就籃輿住禪師
玉版參靜緣天或假世味苦相諳城市蛙居坎功名蟻
戰酣有來求福利誰復減嗔貪風化吾儒在慈恩釋氏
覃教崇緣世主風靡過周南以此山林勝皆為佛老探
茲遊聊適意他日儘橫談翠琰詩如此清吟口詎緘顧
瞻因吐吐前後至三三山主留昏宿征程畏峻碧夕陽

人影澹猶惜動歸驂

壽郡侯

瀚海流餘慶金天間氣昌風姿先相肖節概更鷹揚
衛郡民何幸君侯德最良幾年承此治一日意曾遑
仕臚學彌勵身修志自強民情諳漸熟卮酒不聞香
順事蠲苛媿持難懾暴狂親賢咨政體捐俸起公堂
舉意從人便何心恃已長行春忘逸獵發語見周防
門靜無私謁絃調戒急張早衙長待旦退食到斜陽
奉上惟知謹當

機每克莊清廉安本分孝悌出天常聽訟從輸臆安羣
順牧羊行方端比矢處當斷如鋼誕席陳微獻歌詩代
頌章自憐鮐背叟長對德星光却恐流雲駿終峨豸角
霜所期松柏壽喬嶽共蒼蒼

贈周曲山

官滿周南樂城居漢德翁酒杯隨老減詩句自窮工甕
料黃壘剝瓶儲白粲空畫叉錢幾塊人事日相攻昨暮
招添壽今辰去弔凶新除雖有望舊債積來重咄咄時

書怪悠悠任轉蓬
伸眉無寸樂接物儘多容
憔悴麟遺野昂藏鶴在籠
固知吾道在未免此心忡
夕講詩書共朝遊杖屨同
暗消秋澗鄙卓有苦齋風
一覺平明睡三竿曉日紅
計資徵麴價分口訓村童
縣邑多遺愛文章不濟窮
曲肱而飲水樂亦在其中

夢入閩清府

己丑秋九月二日五夜夢閩府來迓品節儀物之盛有不可殫紀者既覺即其意賦此

夢入閩清府郊迎罄海圻初從亭傳發迓自憲司歸萬
目瞻新使中天仰國威康衢回曲曲香霧靄霏霏單傘
雲垂蓋行歌錦作幃申嚴森赤棒緩進佇朱衣鼓吹連
天動旌旄映日微高乘三丈轎前導一雙駢花覆朝袍
紫沉薰象簡緋散班行有叙社直見來稀覆地裊如織
蒙山繡若絺籠官衫赤褐花帽翠蕤葳天遠綸恩重霜
清牙角巍繁華驚極盛心事豈輕肥白璧防污玷黃金
惜帶圍六條申漢制八郡斂炎輝庶政惟蠲饒流風可

漸微氣和樓吐蜃官肅浦還璣後擁才中道前呵近憲
扉一聲雞唱白推枕蝶分飛塵世真如夢蓬累未覺非
日高詩已就清思尚依依

送李郎中德昌北還情見乎辭

一自清河別經今已十年為尋江表傳重會嶺南天鴻
鵠乘風健驂驅得路先雞香分省署襟誼動星躔洒落
平生契留連祖送筵自嗟衰病客愁卧瘴江烟歲月隣
期耄鄉關近五千依依枝遶鵲跼跼水飛鳶外望何其

切中堅未易鑄崇高疇弗戀筋力若為前落日鄉音杳
秋空望眼穿委心歌已矣適意俟終焉行止雖存數周
旋正賴賢省臺公道在萬一故人憐

謁光武廟

奉詔趨龍朔驅車過鄩南壇傾餘里陌廟古老松杉建
武重明後中原百戰酣同翻思儷景懷古暫停驂像儼
雲臺畫炎開漢燼燾道深柔作理亂自武能戡於穆吾
皇聖英明世祖參有賢勞夢想無物不春涵賤子嗟前

進殘年謾一堪材疎徒意廣學古不時諳杖策非高密
扶真愧耿奔乞靈期睿眷登對協時談景已桑榆晚恩
非雨露貪所思吾道重少負此生慙補報功微效歸休
老亦甘冷飈知客意吹靄御壚醢

和幹臣食粽有感詩韻

傑句欣三復情辭浹且黏君吟元在北我詠實維南粽
品雖云衆名勞不自嫌懷沙悲楚屈設祭入湘潭憶昨
聞辰告周防致思嚴裏纏需彩縷竊食遠腥鮎節屆朱

明近家同玉版參釘盤
犀偃角帶籜笋遺尖製
變菰筒質香浮九子纖
長腰烹得所木蜜助餘
甜老腹防留膩多餐不
過三縛從堂上解爽覺
箸頭添應候然微物因
騷有細談貞賢餐愈潔
讒佞對宜慚我本舖糟
客何心論滯淹

番禺杖

異種來番國知名自老坡
杖才任操倚節目喜摩
掌尺度天然足柑黃氣
自和奇姿含海霧孤植
映江沱物眇

離鄉貴材稀審實訛聲音鏗爪甲鱗介訝鮫鼉鞭馭真
雷策批亢格魯戈重輕欣得所長短稱閒拖扶老攜行
便持危得力多金蛇僵自勁鮐背痒忘苛不自浮槎使
來從老伏波見歸情鄭重未許老婆娑入手嗟神物傳
看駭玉柯支頤看月出橫膝伴詩哦選勝尋泉石窮幽
入薜蘿有時兒女觸却恐鬼神呵蓋節空筇竹神鋒黯
太阿笑揮堪解虎靜倚可降魔靈壽輕無賴梅條皺可
接花藤昏玳暈斑點慘湘娥桃竹那能比桄榔未足歌

望塵甘却立斂迹總無過用舍時當審敲撞責果何更
防雷雨夜衝屋學陶梭

秋月篇壽幹臣周宰取杜默為李文定公廸詩

例

五任稱賢宰平頭數七旬分輝郎宿炯鍾秀曲山春懷
寶須時用騰蛟自蠖伸所期千室富匪為一家貧文彩
唐儒雅規模漢吏循刃游無節錯佩服藹蘭紉訟簡綠
情得民安為賦均處高希亮潔宣化見恭仁今歲逢初

度賓筵聽具陳分安貧愈厲詩健老能神報政長書最
居間任甑塵從容黃卷樂浩蕩白鷗馴大器成應晚烟
霄漸可隣既淹千里足終遇九方歎况復崇公道明揚
到逸民新除行有日舊政說難倫湛露金莖濕清樽雪
蟻新朗吟秋月句來醉白綸巾再拜添眉壽無勞頌大
椿願同蟾窟桂千歲鬱輪囷

送趙都司秉彛赴遼東省幕

世味無餘雋羣居底事爭疾徐誰長者紛拉到諸凡吾

子方強仕襟期最老成
喧聞烏亂集歛聽鳳孤鳴
行已謙而讓持心厚且誠
相看情款洽有問對詳明
再世儒冠素三年秘閣榮
以除遴所選論省諒非輕
營帳稱強翰天威想濯征
海澄鯨已戮地曠物多萌
望重官儀肅民安吏務清
濟時紛筆議展用幾書生
抱志能茲念流勞在此行
秩卑猶吏屬祿足代躬耕
曉日灤江渡秋風鶴野城
蒼茫連渤海控帶本營平
綠水開蓮幕青山送去程
宦遊真衣錦別思任懸旌
有道開先世孤標振直聲

遼陽回首處未用愴離情

送忠翁南歸

元貞乙未春翰長忠翁年七十七致仕南歸行有日
平章侯同諸僚竊祖道於遂初亭館予亦忝陪席次
明日賦律詩廿四韻非敢以為詩庶幾表吾皇元崇
儒重道跨越前人府相瞻懷始終盡禮張大續鹿庵
之貺詠歌見楊尹之榮豈惟上國之光華永作翰林
之故事其詞曰

供帳都門讌非綠歲例過

左相城南別墅每歲春例一讌諸公

時清連日

勝簪盍半鬢坡酒美凌金谷歌酣掩艷娥盛於清洛襖

用裴晉公上巳同

劉白泛舟洛水

柰此別筵何愛客終青顧傷離賦綠

波散花簪席帽泥飲捲鸚螺人世真浮梗年光易擲梭
瑣軒涼吹急綺席落花多散粉霏裊繡吹香入袖羅暫
留春色住莫戀去程蹉峻秩慚同列醜容慘弗醜新亭
收老淚官舸送長河聖代吾儒重詞林寵數頗諾從丞
相允義見柏臺番祖餞賢疏傳衣冠似永和生還梁庾

信贖重魯鄒軻盛事傳千古儒流聳四科丹青前日畫
歎息路人歌有客孤吟悄臨風兩鬢皤圖南鵬運海遶
樹鵲依柯早晚同長往徜徉隱澗阿此懷從落寞起舞
且婆娑道在無南北

朝家立賢無方果
才何間南冠北士

材非謾琢磨醉

歸扶路晚里巷認鳴珂

賦手植檜酒鍾

千載東家檜榮枯與道俱鐸沉金絕響鳳去洛遺雛元
氣蟠根祗斯文見盛汚器圓傷失制稜削嘆非柢梁棟

無隆用杯盤伴飲徒泛香宜盞齊莫獻媿龍觚沾漑餘
周魯淵源挹泗洙雅同吳壽鼎高亞博山鑪刺口論三
代高歌共一壺或延中聖客或約醉經儒閱古因懷昔
相看醉捋鬚蒼烟空左紐偃蓋凜相扶歸詠絲堂樂樞
衣闕里趨回思鐘鼎事一笑付桑榆

哀曹府君詞

維至元乙亥夏四月癸卯前行尚書省左右司郎中
曹君卒於鄉里後九日聞訃適有令開廩拯隰予特

請行將致一哀既而不果逮十四夜見君於夢邀予
坐故第前楹汎滌供具促膝晤言話其平生甚悉夢
中相對為歔歔也覺而賦此聊伸白馬素車之願二
十日辛酉命州屬吏路材代予往奠俾火其詩於柏
原以告君墓魂而有靈尚克昭鑒嗚呼哀哉君諱松
年字壽之享年七十有五世為隰川人

聞訃纔三日夜冠夢兩楹消除開故室拂鬱話平生息
弱哀無託才清老有聲撫懷思攬轡將事過持盈細札

紛遺簡

謂二月有書
寄予故云

山煙慘樹旌素車空佇望
樞馬想

悲鳴懷舊星臨曙傷貧淚滿纓
紫川西邁意端欲為君
行

送趙克敬判定武

趙子公侯裔雍容館閣才
美除官定武增秩自邢臺喜
溢家人敬春融處士懷沼蓮
香幕府衙鼓響廳階雲靜
靈光塔風清雪浪齋敢辭推
按劇那憚簿書埋任貴騰
聲譽隨時免謗猜不教民事
緩肯失上官諧人樂家餘

金史卷之二十三
卷十二
袴官清甑任埃鼎祥新有說世系舊為裁華胄淵流遠
慈親壽域開嚮來餘藻飾此去要培栽惜別輕三載離
筵重一杯君看忠獻業超擢此中來

紅藥當堦翻

紫殿春光晚芳叢夏景暄綠萱垂地合紅藥當堦翻粉
帶金腰束嬈旗絳艷繡涼颺飄碧砌清影動朱軒白傳
吟何婉玄暉思不凡顧瞻栖鳳地折贈詎容言

朱于玉戚詩

至元二十五年戊子秋八月五日夢先師泌陽府君

命賦此題寤寐中得成韻語者數句既覺因足成之

禮制詳三代軍容備百王錫于朱作飾戚秘玉為章特

總如山立張皇見武揚遠伸三令肅近作一身防商翦

歌周雅夷清頌漢昌格苗先此用萬古仰虞皇

以謂帝舜數文

舞于全不尚武致苗頑自格後世以征伐有天下然後象于戈備樂舞以章其成功此後王之德不及也

挽何參政母夫人哀辭三首

友義當匍匐無從涕泗漣升堂原有約臨奠不容愆念

予初何冀嗟予重惘然會須陳漬酒孤酌廣平阡
享福年幾百升堂拜慶三丰容宜象服陰教動周南子
孝終身慕家貧極旨甘并將風樹感彤史後來譚

德邁魚軒貴恩涵鳳沼春遽遺彤管美淒斷素車塵在
母稱賢範康時產異人故家桃李月何止詠蓁蓁

仲和張君孝友純至來求詩因賦此以贈

落拓滄江客康寧白髮親宦游非不達純孝與為隣養
志曾參事遺羹考叔仁汴都三萬戶和氣一家春

致樂如君少長歸便母安物生皆有養色順最為難夏
清簾幃暑冬溫枕被寒慈顏何所喻庭柰見來丹

題常仁卿運使西覲紀行

九萬鵬搏翼孤忠駕使輶功名元有數風雪不知遥抵
北踰鰲極維南望斗杓胡生搖健筆且莫詫東遼

出五代史

突厥附錄同州郃陽
縣令胡嶠止歸中國

三策條民便逾年致節旌夢驚羊胛日嶮歷幻人刀碧
盃堅異黃金甲第高白頭書卷裏留滯敢辭勞

太平宴二首

海寓初無外王師信有征
秉旄麾戰旅漏網得奔鯨
清畫來三捷歡謠沸百城
從今田舍客白首樂昇平
西北烽煙靜東南海浸清
太平元有象帝世見餘禎
愾敵無多殺推恩屢減輕
公堂歌舞處瑞氣正凝平

冬日即事

闕

饑火衰榮突物情
百年能幾日半世太勞生
白首耽書苦黃金過眼輕
有懷如此癖何往不艱征

壽韓生弘

闕秉天然厚青金雅韻多

闕

室鄙揮戈

闕

壘吟來細韓墻氣

闕

見奉璋峨

哭友親完顏仲希墓

宿草西河客隆顛塞外春死留朋義重生與醉鄉隣天
老株林雨魂香蟻穴塵我來還獨酌黃葉鳥聲頻

挽吳衡甫

浩蕩江湖士來從隱逸居醉吟忘楚越箋學到蟲魚拊

髀驚凶訃霑巾覩故書慨然西望斷山色照空廬

壽王子初

近世佳公子詩書看起家處身何不可致養畧無加仁
厚歌麟趾文章粲劒華一尊添壽酒猶及泛黃花

秋夜月下獨酌時回自燕都

堂虛生夜白院靜散蟲聲月下
一杯酒胸中無限清艱
難吾道事冷暖故人情為報南枝鵲安棲不復驚

治穢

聖戒防微漸常懷蔓莫圖菊荒疏
芙蓉竹密斬繁蕪舉目晴山近
當軒怪石孤放教入夜月清影滿庭隅

贈彥政副使

一世佳公子氣涵渾水春衣冠逾遠澤麴蘖豈謀身白壁詩名重清燈客舍新不妨宛馬足暫屈到河神

清明日南寺對雨

寒食無家客禪房喜雨餘坐深僧話永心遠世緣疎厭捲柳瓢醪來參貝葉書傍人從不悟有待曳長裾

酒燼尋春曉茶甌破睡餘
庭虛花寂寂雲淡雨踈踈
有待存終始無心望簡書
何當玉堂客脫此馬闕

秋夜

卧榻鋪筠簟風簷遞晚涼
雲枯涵早氣星爛射寒芒
鐘鼓寒更永乾坤夜色蒼
時危關百慮低首拊空床

出門

因酒敗佳意方知百拜輕
忘機甘李喻重賦赤霄行
踈拙傷吾性傾危見俗情
出門山氣好秋色浪崢嶸

挽真定史二

凭鳳攀龍起貂蟬
弈世侯九天資岳牧
一夢忽山丘樹
挂延陵劍驂停魯相
轉八州遺愛在潯水
日東流

挽武安道

故失邯鄲步憂分陋巷
簾持身心已亂得病衆
知難夜月琴絲暗秋風
旅殞寒人生罹此極命矣
復何嘆

壽雷彥政

南渡衣冠後如君不數人
氣涵渾水秀色映塞垣
春靈

沼周儀鳳商郊魯獲麟壽杯傾菊露同拜倚門親
去歲龍沙月流光共薊門寒華驚晚節客舍壽明樽取
友襟期在傳家命脉存今年秋色好笑語北堂溫

白松

霍岳祠南寺竒松勝所聞孤根生得地衆木迫難羣霜
雪封琪樹丹青變錦紋山靈應見惜時與護晴雲

早發泓芝驛

西邁經猗頓鳴珂夜半過天低平卧斗野迫陡懸河赤

日三庚伏紅塵兩鬢皤老懷多故

闕

禹廟

玉帛中天會謳

闕

周幹臣詩韻

和

近得閒中趣都無俗物侵風霜驚老鬢道德負初心枕
倦書橫膝庭虛樹有陰殷勤周吏隱時遣道清音

和秋漲二首

泉峪從今會奔流到衛雄新詩來幕下歸興蒲舟中

取少

陵胡為只合例

怒捲濤山北雄吞海若東我思泛舟役

用左氏泛舟之

役輕惜幾干功謂太宮之順流而下

雨後聞溪漲先聲噴薄來氣嚴千騎駛波急萬窠回終
古朝宗去神功念禹開寄言歸義子款塞莫遲徊

題有趙義士三侯祠

雙豕連遺廟風雲擁義壇
難興忠可壯事集死尤難烈
日丹衷皎青山白骨寒
一杯來酌祭用激懦夫肝

禱雨孚惠靈祠

夜半清源道來伸禱雨誠墳
園形覆釜泉邃碧為泓霸
業開三晉風烟暗九京
一杯臨水坐便欲濯塵纓

慶王丈子壽八秩之壽

遺愛汾西政耆英故里居
期頤八十壽精健五旬餘
捨

眾春流憇龕燈夜注書更憐溫清際蘭玉滿庭除

奉酌胡紹開外郎

畫省胡員外都城憶昔遊分攜無半載渴仰若三秋已
辦催科拙寧煩任智憂何當償宿願相望兩山州

星子鎮道中

北下星關道川開百里寬夢殘傾錦恰吟細緩征鞍土
峽深回洞山田壘醮壇一杯亭傳酒來為敵霜寒

題柏壁鎮

峽古疑天設，管空故壘存。
捐金行楚閭，力戰決齊吞。
馬足沾霜健，山烟漲日昏。
治安誰有策，一笑出關門。

夷齊墓

遠避東鄰塵，還遮北伐頻。
與天重立極，叩馬死成仁。
落日悲歌壯，東風紫蕨春。
一饑雖可療，終媿是商臣。

愛井

廣孝銘遺井，千秋仰有虞。
側微多在困，捐蓋失之誣。
喬木非三代，雲烟接兩都。
依依風樹感，不待露霜濡。

河中

歷按河東道蒲津勢最雄河山全晉鄙土俗半秦風野
日連虛壘孤烟認佛宮論功無汗馬極口說先公

登歷山聖人嶺

形勢開三面臨觀醉魄醒松悲虞泣涕石老象頑冥澗
水縈瓜蔓荒山卧虎形野人無所解尊禮九真靈

跋運使張君會琴圖

雪徑尋無路東林素有期琴絲凍欲折風袖曉還披偉

觀疑韓愈幽林付穎師無由陪杖屨只悟畫中詩

田間

斜日秋瓜圓雲間雨過初平疇交晚吹涼意滿輕裾草
木浮元氣河山擁草廬拊心欣有得重展故人書

雲帶山籬薄溪橫舍屋斜卷懷忘仕版作苦事田家疎
散藏吾拙敷榮眷物華晚涼沙岸靜植杖自耘瓜

漠漠西山雨東來意甚徐潤深滋厚壤洒密下平蕪巢
燕歸飛急林鳩得雨呼有金堆積斗能掬嘆乾無

過萬泉縣今廢

縣倚孤山碧岡圍落照紅一丘歸慘淡千室想豐融絕
澗縈樵徑懸崖半土宮物華耕壤狹寧得不唐風

秋澗集卷十二

欽定四庫全書

秋澗集卷十三

元 王惲 撰

五言律詩

哀尚書高公詞

維至元十一年甲戌十月壬子故吏禮部尚書高公
以疾薨於位嗚呼哀哉明年乙亥夏四月丁巳考工
使者蔡鉉自相抵晉始知公靈櫬歸葬安陽秋口鄉

臨穴者幾萬人僚屬士友會哭皆失聲憚辱知最厚
嘆斯民之無祿痛知己之難遇自非歌詞無以寓餘
哀而露情臆也乃作挽詩三篇表於素旂之末尚冀
神靈鑒茲哀悃其詩曰

翰學期公淺謨猷冠一時立朝稱極諫連茹愧深知斗
舌承天眷風神夢羽儀北揮千字誅悲絕七哀詩

一作
思公

情曷已漳
水日東馳

風調祥麟士文章太史辭行身無少玷持論有餘師落

日孤忠壯秋風兩鬢絲幾行知已淚東望重淋漓

聞望羣公表枝撐大厦材印窠空瑞錦風憲黯蘭臺反
拭驚麟出云亡動國哀千年遼海鶴華表倘歸來

枝撐一作

持扶

送成耀卿尹

邑古仍鄉采民屎待尹蘇千年留故事一治聽歌襦鼎
鴈調應切山川慘未濡莫辭淹兩考留潤溉焦枯

奉題趙侯禹卿東臯林亭

雅性便林壑紛華厭市城
庭柯交美蔭好鳥變新聲
喜見桑麻長誰知寵辱驚
門前輪鞅滿一醉共秋成

物長同天壤流年遽代更
高臺方畏景喬木已秋聲
默然盛衰理多忘悔吝情
只須都釀酒時與故人傾

今年秋穫早臺迥暮登時
野徑人歸絕烟林鳥去遲
有來飛蓋客日課讀書兒
適意有如此此外安所期

築臺連野色架木繫匏瓜
舍外開三徑壺中自一家
愛吟歌白紵漉酒脫烏紗
更喜南牕下秋風菊半華

野迥門開早心閒起自慵林香竊社甕山暝倚吟筇半
醉留佳客深耕愛老農晚眠誰復覺墻外月明春
趙侯敬愛客每云相見稀不辭高會數但恐賞心違白
酒夜來熟黃花香正菲賓僚多暇日無惜過柴扉

重謁樓桑昭烈帝廟

百里燕南道山河統帝宮荒村仍故里喬木幾秋風簡
策經綸在丹青戶牖空寥寥千載下無愧孔明公

固安道中

十月燕南道提封入按巡青霜嚴比雪枯樹老於人尚
遠經綸妙須勞撫字頻前林烏鵲盛喧集戀餘春

除蝗

千杖呼聲急人懷愾敵看日長旗尾困圍促鼓聲乾人
與蝗交戰天將雨助殘東林茅屋底客枕夜來安

秋日過濟衆僧舍

院靜鐘鳴後僧閒暑退初過門無俗客閱古得名書納
潤香留几心清月印疏仲殊襟爽在開口見真如

送紫陽歸柳塘

千古文章事江河不廢流苦心分正閨書法繼春秋
繞秦山遠天教闕里遊會將洙泗教行復巧西周

午憇陽城北龍泉寺

倦客鞭催急龍泉一解鞍在家貧亦好行路古來難
寺古松杉老山空水石寒萬松亭廢久重拂短碑看

碑大定間

刺史楊庭秀撰真奇作也

簡寄龐雲卿

軹井千年邑提封百里侯剖繁人有賴治簡事彌優白
鳥翻林表青山滿樹頭訟堂歸去早總是釣詩鈎

九日夜燈下即事

五十又加三行藏默自諳去年留薊北今歲客漳南官
事何容了君恩未報慚白頭青鏡裏衰謝百無堪

詠史開府宅鶴

迢迢華表客吹落故侯家孤潔真仙驥飛鳴稱彩霞因
眠依竹石饑啄半蟲沙會待秋風舉巢雲養頂砂

清苑道中

野店春風裏行人避繡衣劍華寒有暈山日慘無輝孤

隼捎雲下羣鴉結陣飛鷺鷥無遠泛事外本忘機

又作
澄清

吾有志天
意肯從違

至元十七年正月十三日巳刻出完州抵暮入

保定夜未分雪大作至翼日午刻方止偶得此

詩預喜歲事之有成也

曲逆連清苑相忘兩舍中朝驅塵沒馬夕捲雪填空已

滌崇隆盡仍歌歲事豐小紅燈影底一笑覺春融

一作誰云

吾分薄所向得災凶

答蠡州天寧寺長老

洒落天寧老攜尊復袖詩逢場間作戲來謁老監司白

頂憐香土清吟說阿師一盃供客笑聊用當門搥

一作枉教

頭腦異初下問天鼻

座中偶得示舜舉舊遊仲賢良醫

半載東州客崎嶇笑自淹事隨時即改老與病相兼發

伏遺奸拊拳惟愧具瞻君恩如許報白髮且休添

龍門寺

寺古僧何在
山空石作門
碧崖懸瀑影
蒼峽掩朝暎
不惜山公履
重登謝傅墩
一杯須軟脚
掃葉煖清尊

辭長樂先壠二首

己丑歲秋九月二十六日將赴任福唐拜辭長樂先
壠歸宿野竹趙氏田舍且喜聞村之故名因有是作
別遠辭先壠歸遲宿近莊客牕疑夜煖野雨變晨涼游

宦嗟吾老窮居仰歲穰故鄉猶足樂誰遣去殊方
展墓過農里銜恩使遠方氣隨天北轉人與雁南翔肝
膽孤忠在江湖去路長此回當自信不必泥行藏

飲食

飲食資吾耄行年六十過三升元有料一口不容多過
爽心隨滯長噓氣便和不須移遠步聖藥有東坡

辭先壠後臨行作

義重煙嵐薄人微使節光桑榆雖晚景事業見炎方回

轡知非遠趣裝苦未涼交親留少住馬足健秋霜

望舍弟消息

憶弟居穰縣嗟予宦建陽三書曾未報一別謾相望喜
信占晨鵲清唵夢夜牀殘年能幾許長與汝參商

後會期初夏遐征動暮秋方吟書渺渺兩地思悠悠問
竹過門巷看雲倚郡樓南遊曾有話會上沔陽舟

居守縈家累懷歸畏簡書人憐英蕩重我覺宦情疎緩
進需安信頻呼斫素魚後溪溪上月北望想躊躇

送趙克敬任孟州同知

趙穆從英妙詩書性所安向為太史屬今作孟津官事
辦時為切民恬政貴寬老夫江海去州縣莫辭難

蕭相國廟

下粟東南陸都城井邑空圖書秦府夢簫鼓漢家宮喬
木秋烟慘頽垣野燒紅數鄉供野祭歲歲不期同

火獵

綠竹連亘遠蒼烟散野昏兩傍羅草伴一火趁羣奔徒

手遮麕鹿張弓得艾豚縱觀思獵較積柴散燒痕

汴堤道中

細竹沿堤綠秋烟蔽野蒼路荒經柳子山遠指芒碭勉
進心還尼懷歸事詎量縱今空往返猶得看維揚

十一月十三日宿濉寧夢總帥史子明見教

矯矯常山帥相望間楚齊夢中親與誨身外別無提切
囑心何朗臨辭手重攜何時揮老淚墓額拜征西

次宿遷望紫山不至

河廣舟航小堤長市屋卑宿遷元隔楚淮甸舊連邳濁
浪隨清變香粳問客炊紫山前有約底事北來遲

淮安州

平野淮園甸雙城入楚州喉襟開重地鼓角動邊樓聞
雁思鄉信歌魚換劍緱此行安所遇江海任浮鷗

是夜
驛亭

無祇待故有
歌魚之句

寶應道中

共說淮南冷今冬氣陡增雲垂梅野雪風結漕渠冰事

弊網常密吾衰用不能據鞍時自笑休苦直如繩

出寶應雪中舟行

避冷乘官舸風篷去若奔兩陂雲影黑一片雪花繁景
與詩相會寒無酒可溫泥橋投宿處寒日暮鴉昏

高郵道中二首

築甬餘三百彎環護漕溝重橋穿寶應一岸入高郵水
陸開亭轉烽烟靜塞愁腰纏無十萬官遣上揚州

湖浸通淮水孟城隱楚防百年勞士卒一擲失金湯陸

走無關禁舟行半海商此邦多秀彥國士說秦郎

召伯埭

謝傳留遺愛千年尚不忘埭名同召伯郡號屬維揚烟
火今中土干戈舊戰場離離平野樹人指是甘棠

一作新橋

穿市過十里藕花香

揚州

淮海維揚域金湯勢尚存車書歸一混鯨鱓失孤吞樓
鎖行雲夢岡環洗玉盆治安君有策長嘯出東門

衢州

我歷江南郡凋殘不似衢
兩坡稱鬧市一炬變荒蕪
反側誰無識瘡痍意未蘇
殷勤陳別駕不厭拊循劬

早發三衢驛開闕放曉裝
江風吹帽側山月照衣蒼
馬渡浮航水雞號野店霜
爛柯聞有局無分躡仙梁

州南三十

里有天然石梁長約
十丈謂之爛柯仙界

玉山道中

石徑行無盡清溪送馬蹄
啾啾啼野鳥滑滑喚多泥
松

密增晨黑川斜入望迷比明三十里已過玉山西

常山道中晚行

土蹬盤黃嶺人家住碧峰
焚林人逐獸競渡木為龍
水獲無過夏山行不識冬
斜陽留絕景不放晚烟烘

信州道中

控帶谿山嶮襟喉福建門
吳音饒駛舌越鼓聳邊屯
岸闊浮航小城卑夕靄昏
不煩詢土俗烟嶺互相吞

石溪道中

赤嶺鉛山界清溪野店橋
株林煙漠漠沙路雨瀟瀟
馬慣行安險禽幽語弄嬌
西山晴更好詩思苦相撩

鵝湖寺已丑冬仲望日雨中過此坐間為主僧

希聲留題

湖頂開鵝沼川形偃法船
寺留金粟影僧結草鞋禪地
勝多珍木山空響夜泉
寺僧談遠跡張本永貞年

唐順宗年

號

閩中

錦繡無諸國曾經漢武荒祝融開火宅颺母擅風囊淵
萃逋逃藪人依虎兕鄉閩中不識雪可有豸冠霜

閩清湯池留題

熙寧十年八月赴福唐元豐元年九月被召還朝往
返皆經此十五日南豐曾鞏題僕以大元至元廿六
年己丑秋按部來閩與令裔孫冲子同事明年秋以
理去官與先生往還時月畧同曠世相符有似非偶
然者摩挲辭刻留詩而去重九前四日小子憚序

潦倒嗟吾耄淹留近歲終客星回海上桂棹發閩中遠
宦無遺累歸帆得順風湯池看蘚刻往返似南豐

建寧北苑

北苑繁華歇名猶博望尊野花疑靨珥徑草半蘭蓀軒
縣歌鐘暗宮樓峻地存我來凝眺久喬木晚烟昏

望嶺

谿嶺無千里崎嶇半月間事機須勇退天意許生還順
處從多厄趨時免強顏越禽忻我往長路語關關

鵝湖道中

細路山園靜，烟蘿野寺濃。
俯躬升峻嶺，仰面看喬松。
道在從時背，才疎防性慵。
有身官不屬，一任老龍鍾。

是日得臺

報故云

題何山寶嚴寺壁

同遊者山長，趙文龍前教授。
徐夢龍，就友教官，余性道。

二人皆廣信人，徐友文筆最健。

府推官保定張式儀，卿別駕東平。

陳珪國寶子，公孺侍行。至元庚寅冬十月望日秋澗。

老人題

龜阜西南麓名山世少雙爛柯仙有局絕觀石為碁事
去空遺史風恬愛此邦來遊情眷留咏寄僧牕
喜得陳張友來遊興不孤江山開怪供風月閱清都閱
世驚棋局看題倒酒壺暮歸應糴載只欠畫為圖

首夏家居即事

懶憤從鬢鬢披衣任曳裾多忘身外事貪讀意中書比
老心能爾雖貧樂有餘繞園欣細履樹影綠扶疎

竹茂資泉潤花榮藉圃沙
鈎簾來舞燕鎖樹護栖鴉
客至留酤酒吟長待煮茶
幾時容却掃一向似仙家

方竹杖

節勁嫌園甚形方與衆殊
任從炎漢斷不變魯人觚
心曠謙中守姿堅直外扶
蜀筇非我友釐簡是吾徒

枯燈花

步入東瀛丈吟看北檻花
春風收翠葉烈日發炎葩
一氣元無間孤根乃爾差
鄭箋初不及党咏只空誇

送杜僉事之任江西

憶在齊州日同聯憲府鑣郡居推健羨孤繫更迢遙此
去雖殊域規為祇舊條將身能道護所至儘風標

和幹臣重九日雨中醉歸韻

高會有成約寧為一雨妨烹雞酌白酒煮芋嗅秋香落
帽同嘉興霑寒等陞郎醉歸從健到聊復少年狂

今歲登高節佳招兩有妨閉門時隱几掃地靜焚香安
得黃金耐同傾白首郎醉鄉多樂事何祇發詩狂

事一作地

舍弟仲畧題孫鞅郎名字說後

訓汝諄諄意奇文見迺翁洞堅威可大栖鵠體須中既
應開先兆當知矯揉功遠期遺近效羽夾看摩空

贈藥子英詩

子英外郎孝廉士也十年前子與共事於沙麓者凡
兩月今歲秋將命過衡踵門來謁話間因及親喪事
予以伏臘一氣遇之者固然其歿而不壞及膚髮猶
生如藥氏二親者蓋亦罕見豈迺翁與媪生有所積

而歿有以孝心之所感者然邪乞言顯親書此為贈
其辭曰

孝感元多異藥翁見化形初終神不昧將祔面猶生盡
謝青蠅吊堪書翠琰銘百年風樹底腸斷蓼莪情

贈岳鍊師仲和

今年八十四健勝去年時豈假還丹力沉潛繕性辭骨
清儀野鶴神爽見毫眉更有虛明處物來多預知

月桂

花名誰品藻歲與月華新不屬孤根細能留四季春
子深丹竈術葉映碧苔烟我近雕欄側終朝倚杖頻

賦白鷗

羽族幽閒品霜毛縷黑章聳冠矜耿介

蓋因栖止不雜于衆禽也顧

影惜飛翔去備虞人貢行觀上國光刷毛琪樹底無夢
海山蒼

京華舊俗歲終廿四日諸神上界夜家人設祭
遣奠致詞且有過過揚善之囑遂作小詩庶見

風物

五祀開三代人間閱歲華交更同選調遣奠具飴茶天
闈神驂馭燈青喜結花逢新如有問萬一善相誇

和曲山冬夜即事韻二首

清苦周南樂居官素有聲
老天抑汝困公道欲誰明
瓶罄憐三白衾寒盼五更
捋鬚疇賞識吟苦撚霜莖
雪夜清無寐瓶笙細有聲
茶鐺吟待熟虛室白生明
白髮催人老青陽迫歲更
湛思盤露重何意望修莖

春酌舍弟仲畧見寄之什

隔闌三年別回還萬里程細吟遠
句深見友于情路
渺霜風勁吾衰體履平家貧渠亦老一動不為輕

挽宋耀州漢臣二首

每有遊秦士慙懃問宋侯相望無兩紀一別便千秋斗
酒新豐客堂封渭水丘題詩何限恨老淚不成流
斗酒新豐客龍門接上遊相望纔兩紀一夢便千秋銘
德辭無愧親民政最優兩行知已淚撫卷為君流

辛卯歲十二月望日大雪連明信宿開霽日色
暄妍如春乾坤清淑之氣肅肅可挹數年來未
之見也作小詩以紀

我覺今冬氣全關變理權一寒嚴往歲三白見豐年地
掩浮陽靜天開麗景妍不應薪米價愁計畫義錢

五加皮酒

服食閩中士加皮說異常精華含五氣補益最多方不
羨黃金載長澆白玉觴豈惟除濕痺志意日安強

題杜氏六子名後

六子名三老餘芳見故家
翰音鳴彩鳳翠茁映蘭芽
出拜濟南日今看漳水涯
一謙能事畢題咏復何加

燭花詩李真人索賦

燦燦銀臺燭清光散彩霞
誰分壺內景來種火中花
一轉芝垂蓋孤芳蕙茁芽
殘年如喜合世事任無涯

火罐

兩手寒來疥摩抄負汝溫
形骸雖土物氣勢炙權門
燕

玉休誇暖湯婆可比尊心兵全不起留在谷神存

題甘河遇仙詩卷

恍惚甘河遇生龜脫殼時二仙形姓字一酌晤天彝入
道茲玄竅尋源接上池嘔山文最雅畧不見諛辭

和仲常牡丹詩

并序

仲常良友氣溫而德雅余愛之重之未有擬之形容
爰因賦咏遂見賡歌故情之所鍾有不嫌於太切者

其詞曰

漢殿承恩早金盤薦露新色酣中省藥香重錦窠春儘
殿羣芳後誰辭載酒頻清如司馬相也作插花人

題郝氏世德碑後

故國非喬木雄藩有世臣河山盟帶礪勲業畫麒麟白
羽沉蛟匣青雲滿後塵雅歌平日事遺愛在斯民
草昧經綸際恩威見郝侯功成韜將略德洽配汾流金
甲春農野黃雲畫角秋哀榮何百世千古仰山丘

八月十二日夜病不能寐步月達曙

官事未易了癡兒昧獨勞病多和夢異蛩若為秋號事
業青燈苦星河紫極高帝城人海裏汎汎一漁舸

大行皇帝挽辭八首

至元三十一年歲次甲午正月廿二日癸酉夜亥刻
帝崩於大內紫檀殿既殮殯于蕭牆之帳殿從國禮
也越三日乙亥寅刻靈駕發引由建德門出次近郊
北苑有頃祖奠畢百官長號而退臣憚職在詞館追
思不已作挽辭八章庶幾鼎湖攀髯之意其辭曰

灑水龍飛日長楊羽獵時天顏凡五見雨淚遽雙垂化
日中天赫陰靈萬國馳何由知帝力耕鑿樂雍熙

晏駕纔經宿憐車出建門千官紛雨淚六御迅龍奔雲
氣蒼梧遠天山禹穴昏依光瞻日月頌德象乾坤

威破羣雄膽恩藏四海心聲明三五盛垂拱九重深國
論多儒斷天機入睿臨小臣務面血無路洒松林

聖神由廣運纂述到無加禹甸逾輪廣殷邦極靖嘉尊
臨三紀久遽陟九天遐白首金鑿舊長號自倍嗟

端月辰臨酉淵衷弗寤興紫垣逢彗字祀國駭天崩法
從嗟何及朝臣痛不勝聖靈知在上春草認封陵

去歲回鑾輅旌旄擁萬靈今春辭畫翬弓劍閟泉扃

宸虛瓊島雲龍慘帝庭

是夜殿庭有光若
燈燭然良久方散

詞臣思補報

淚溼簡編青

論治方堯禹求賢到釣耕民區無二上廟算有奇兵萬
寓風烟靜中天日月明小臣思頌德終了是難名

帝系三宗上麟經一統尊火盤承正據虎落入雄吞窮

覽南交獸奔騰北海鯤不教擒一索遺恨付皇孫

題冀州馬同知拜慶詩卷

矍鑠征南將忠勤為國知任官無調轉享壽到期頤錦
爛行春里香生拜慶詩眼前蘭與玉又見福生基

秋日下直玉堂

下直玉堂廬閒拖過市車秋風殘暑候積雨暮涼初撥
置難行事尋看未見書萬緣前已定不樂復何如

餞安南國王弟回鄂渚

萬里朝天道歸軒寓武昌觀光吳季札助順漢闕王寵
渥心逾赤新詩桂有香庾樓回首處秋月興尤長

雪夜聞鐘元貞元年冬無雪十一月廿一日夜
大雪喜而作此

雪屋燈青夕疎鐘定夜鳴撞餘周遠韻聽久喜雙清爐
火留孤坐茶鐺待一烹已眠猶未寐詩向枕邊成

王氏拜慶詩

井序

集賢大學士王顥太夫人張氏元貞丙申壽八十有

八視聽聰明起居康健剪製纂組之事老猶能工正
月十四日蓋生辰也中書右丞張公以外堂拜禮義
重諸人前期誕彌啟之太母特召見宮閣存問再四
嘉其賢淑留燕賜幣下暨二孫皆霑寵渥明日翰林
諸君相與奉觴上壽百拜獻詩猥當卷首

九秩康寧壽親承燕賜恩香融彤管煒春滿繡輿温世
與名郎孝天全五福尊佩環聲合度清響徹宮門

賈仲和慶八秩

君前宋魏國文元公遠裔其家
世備見遼山所撰千秋後錄

太史徵文獻陰功滿諫章諸孫宜曼行八秩見康強孝
義聞東魯簪纓慶北堂千秋遺錄後奕葉又生光

慶閭庭直壽母詩

洗髓黃眉壽儀尊五福全雍容班母訓瀟灑謝庭仙致
樂孫能養居官子更賢霑恩行有日香重誥鸞牋

送喬元明

疆理初無外乾坤大統齊漢恩同一視星鳥望中低海
甸沉銅鼓天書坼紫泥皇威能遠暢歸旆拂雲霓

榕樹

南來過劔府嶺岸樹多榕
繳結如蛇蚓堅凝比柏松
葉芽生挺茂陰影散芳濃
鶯羽羣飛日凋零却是冬

五言絕句

贈高邑趙教諭

坐久槐花落黃金滿石牀
一林春露冷情話不知長

冬藏和曲山詠懷原韵

吾道有污隆人情逐冷暖
自憐心事佳不覺天機淺

一作

克教俗意無
任使天機淺

貧居固鮮歡漏盡行當止只有苦吟心時時為商起
巨鈎釣鮮鱗其勢兩難著何當掩長圍為君獵麟脚
却掃吾未能人事日復日泛愛聖所稱亦復論損益
才疎詩倦吟年老酒當止君看古井波澄湛自不起

安坐

此心與天游老我無繫著炕頭有春溫安坐收兩脚

讀史

紛紛世利塗翳翳桑榆日賢哉向長心一損勝三益

咏梅

折來何處梅自掇孤根暖寒花本強顏風味空不淺

己亥歲門帖子

不羨陶朱富非悲阮籍窮愛君思道泰憂國願年豐

跋呂友扇頭

井道養不窮濟人非望報過飲投青錢取廉非正道

秋雲自激

行雲映空明
嬋嬋飛輕轂
風吹不成雨
日落空相逐
夢中得

燈殘細暈黃
月落孤窻白
惡夢不成眠
幽魂驚撇捩
望淮

朝日慘無色
昏昏水氣間
到淮猶數里
隔岸見尖山
夏夜

庭竹影扶疎
清風晚騷屑
夜涼人未眠
卧看牕間月
出門

東風吹陰霾朝來晴霽開放眼門前去青山城際來

雨後看山

西山色蒼蒼雨後如新沐天高晴意寬歸雲滿巖谷

夢中得

持酒濯利劍青蛇光黯然金鞭鞭駿馬汗血粘錦韉

喜雨

癸丑六月旱草木變萎黃夜來聞雨落起舞亂登牀

秋夜

西風入庭樹掩冉衆葉鳴幽人不能寐愛此秋雨聲

中秋制中對月

露冷庭梧墜天高月影長清光不堪掇和淚溼衣裳

披襟

涼風東北來蕩盡中夜熱起視河漢星微雲淡明滅

秋澗集卷十三

欽定四庫全書

秋澗集卷十四

元 王惲 撰

七言律詩

哭劉房山

紫髯山立蔚揚休，書學推君到晉流。
文冢氣嚴驚卧虎，墨池星黯失蟠虬。
眼中人物嗟何及，身後珠璣散不收。
我擬九歌投濁浪，重傷我道轉悠悠。

中秋月

夏苦蒸雲歲晏霜月華還覺此宵良
天容澄徹銀池沒
桂影飛來海氣涼
老魄不應秋更苦
賞心多為事相妨
一杯儘吸清光了
洗我平生芥蒂腸

送王嘉父

新知雖樂道
彌親尊酒燈前便
故人時宦儘從閒
處著
浩歌還愛醉時真
紅蓮幕府名兼隱
春草池塘句有神
恨煞百門山下水
錦波流不到東秦

一見襟期倍所聞，霧崑玄豹隱奇文。
清樽皓月應無幾，赤日黃塵遽爾分。
濁酒可因微恙止，天葩寧為舞裙芬。
百年湖海論文地，興在江東日暮雲。

和靖教授送行詩韻

出處初心度義行，蒼天誰識此精誠。
十年載質孤懷苦，一宦縻人故展輕。
時事失聲驚破釜，幕蓮晴闕媿參卿。
夢歸夜夜栖岩桂，猿鶴無勞久怨驚。

秋日言懷

雨後秋堂早暮涼竹風飄蕩藥塵香身閒正坐詩成癖
親老何堪病在牀書卷日隨秋草亂壯心愁入野雲蒼
摩挲老鏡蓬窻底也效樊川洗鬢霜

清明日錦堤行樂

浪說蘭亭禊事修年年春好錦堤游花翻舞袖驚歌板
柳隔高城暗酒樓綠樹恐因春事老金鞭重為使君留
竹西路晚歸時醉何處珠簾半上鉤

八月十九日晚晴

積雨收霖景氣清物華雖老覺容平閒雲知倦爭歸壑
飛鳥趨林不計程山偃翠鰲驚突兀天浮圓蓋失枝撐
化權舒慘吾何預要擬樊川賦晚晴

上史節使晉明壽

尚父忠勤歷五朝承家又見鳳遺毛神鋒洒落青冥闊
秋隼騫騰華岳高治化載清遵定法德容充擴浹吾曹
年年畫戟清香地常對秋香醉露桃

南城納涼晚歸

書院歸休日已曛
南城風細晚相親
坐來近市喧初息
歸到衡門夜向分
矮榻趁涼欣稚子
疎燈留影伴廚人
一盃粥了從高卧
須向閒身等策身

七夕立秋

庭竹風生好雨過
碧梧飛下鳳凰柯
人間一夕驚秋早
天上雙星恨別多
鈿合蛛絲遺暗網
綺樓雲影淡明河
柳州羨煞天孫巧
其奈微生賦分何

涼夜

祝融怙權不肯退一夕好風吹暑回雨氣淡從雲尾散
秋聲涼自樹頭來渴腸夢濯西江水逸氣欣逢北海杯
憑語蘭臺宋公子莫因雲物詠悲哉

八月十一日夜坐

輾轉秋懷鬱不平憮然方寸若為驚學疎久昧天人理
親老尤深喜懼情坐對燈花供笑語近聞庭樹散秋聲
大家但使康強了未害窮愁老此生

雪晴望

滑滑春泥雪意融出門藜杖任西東
光風漸好茆簷喜烟火全球傳舍空
三穴既能容狡兔五噫誰復羨冥鴻
更為著眼登臺處頗覺江山王氣雄

題何練師巨川虛白菴

西風吹下鏡湖船來作空山避世仙
採藥遠辭滄海上結茆歸老白雲邊
鑑光應物元無物素質能玄本不玄
莫遣碧桃溪畔水暗香浮出洞中天

鵬雲蹤跡亦垂天收斂多歸一室間
塵境夢空神已止

松巢枝穩鳥知還
潭心映月清無滓
谷口行雲意自閒
想得翠蘿幽隱處
天風和水泄空山

太康展江亭

籌筆規模盖世功
新亭高構繼遺風
乘秋閱武邊聲靜
臨水投醪士氣濃
騏驎纔聞空塞北
樓船行復下江東
慙慙淮水東邊月
幾照元戎坐折衝

送紫陽歸柳塘

掛冠神武急趨裝
歸隱秦中舊草堂
海內共知元氣在

井邊已仰德星光眼明華嶽蓮峰翠路入函關草樹黃
預為山林報歸日綠楊陰合鄂南莊

送蕭四祖北上

丹鳳銜書下紫庭秋宵光動少微星蒲輪再起秦遺逸
天意將新漢典刑長策正勞黃屋夢故山從使白雲扃
中原有幸經綸了天外高鴻本自冥

上庫庫學士

六轡連翩走使車繡衣風采漢相如紛紛漕計歸鞭策

戀戀丹心在帝居折節不知軒冕貴濟時行奏便宜書
從今慰却蒼生望一點文星照玉除

士子夏六月陪蕭徵君飲方丈南榮同會者烏
達使正卿董端卿經歷學士徒單雲甫張提點
幾道王秀才子初洎家府小子憚隅侍席末云
修竹脩脩風滿廊夜深樽俎得追涼浩歌聲繞銀河水
畫燭光凝燕寢香雪蟻十分浮大白德星一夕聚高堂
停杯更待東山月要吸清光洗肺腸

送王子初東行

岱岳西南碧海東，青齊中據震維雄。
驚猿別鶴休增怨，詭觀奇蹤得盡窮。
劍暈寒輝騰寶氣，馬搖金蹀健秋風。
欲知別後相思夢，多在西山紫桂叢。

杜君美耕隱堂

厭喧耻向市朝居，歸隱南城舊草廬。
黃葉落時農事隙，青燈明處夜牕虛。
寫懷草就凌雲賦，貯腹看殘種樹書。
翠竹白沙村路晚，月明幾駐故人車。

春懷和珠虎坦夫韻

茆屋春深懶閉藏，出門藜杖獨相將。
春光暖透芝蘭谷，風色妬殘桃李場。
論政舉知南國弊，賦詩休詠北風涼。
浮雲軒冕非吾事，擬訪無功覓醉鄉。

雨中與諸公會飲市樓

每恨人生會合難，興來一醉盡君歡。
雨沾翠佩簾花細，酒凸金杯飲興寬。
胡舞旋低翻翠袖，珠喉穩怯春寒。
朝來酒醒蓬牕下，依舊春風首宿盤。

秋漲後晚訪王柔克書舍

種柳堤邊起暮吟黃金不鑄百年心
垣墉傾圯水初退
門巷蕭條秋向深但遣歌詩酌野逸
儘隨鄉社共浮沈
鄰墻酒美中秋近明月柴門約重臨

報子初以書見慰

擁鼻吟成嘆索居眼明驚見故人書
邊城秋靜沈寒柝
畫戟門深曳翠裾契闊祇應分一水
笑談曾不廢三餘
荅君不忍虛來意呵筆裁詩雪滿廬

春望

黯淡春雲雨意微
小樓孤影立斜暉
書能引睡聊遮眼
酒可驅愁任典衣
桃蕾有情含笑發
雁行無力拂雲歸
倚欄不盡登臨意
獨對東風咏采薇

冬夜坐

虛堂人靜鼠窺燈
霜葉蕭蕭散雨聲
睡眼看書渾勉強
夜窻得月喜虛明
漫漫長夜何時旦
悄悄孤懷百慮橫
到底麤冠男子事
幾回投筆壯班生

砧聲

鵝溪蠶繭太豪華，新紙蒙茸隱細紗。
不惜秋砧聲夜杵，要翻新法自吾家。
搗勻楮脈光舒練，拂散龍煤字點鴉。
我錄詩書何所事，擬尋源委泛靈槎。

夜歸

月波環暈晚風淒，賓館歸時獨杖藜。
曲巷門深鶯剝啄，小樓燈影自高低。
歸期有限先回鴈，世事無心類木雞。
淡蕩春風二十八，忍將書劍坐羈棲。

壽周都運

劍佩龍樓顧遇頻
漕臺今復試經綸
平生許國丹心壯
此日承家玉樹新
德量潤涵淇水遠
壽杯光動紫川春
朝天好在明年日
金印重看拜伯仁

秋雨有懷呂丈子謙

賓館光陰一歲中
飄蕭吟鬢感秋風
久諳世事無多味
靜覺書編有細功
四壁夜蟲秋思苦
一窻寒雨客牀空
對眠不見蘇州守
縱有新詩愧未工

壽王參謀二首

郁郁卿雲靄士林不應止作一方霖無媒致位寧私已
有子傳家足慰心中卷在庭公事簡壽毫浮綵蟻罇深
非詩莫頌千春德喜對梅花入細吟

典郡風流漢表儀一方春物自熙熙謝公雅量推平昔
揚震高風到四知畫戟清香凝燕寢東山春酒照芝眉
政成不獨褒金爵賢守恩波在鳳池

贈元仲一書記

名寓緇衣行碩儒蒲輪却走事巖居萬緣擺去聊乘化
一念深來為讀書黃閣經綸宜自重青山談笑未全疎
相望未入廬山社日暮碧雲思有餘

和仲一詩韻

世事紛拏八九違未容丘壑淡忘機須知霖雨思賢佐
終擬卿雲捧日飛麟閣勲名驚壯節虎溪公案覺前非
會看杖策軍門去滿眼行山空夕暉

娛志詩書不厭貧蟄龍冬卧不求伸應憐擁篲侯門下

何似行歌澗水濱沙鳥忘機還自樂池蛙睥目欲誰嗔
悠悠物理吾難料會得摠衣問上人

送百德正臣之汴梁

君璋序裏仰高懷賓館相逢一笑開過眼總非如意事
著詩時遣不羈杯人驚駭骨空燕市夢逐秋風上吹臺
去去當途足知己未應空使劔鋒摧

贈王修甫

樊川風調錦囊詩邂逅青樓豁所思得酒愛澆吟舌健

放談時露劔鋒差香翻月戶情難極風入庭梧鬢已知
過眼紛華終寂寞望君冠蓋鳳凰池

挽趙父師提舉

走馬南來及撫棺磨礮空使憶當年師資有道無虛飾
賦業推公得正傳黃鳥此時空止棘青藜何處伴談玄
緬懷壽德宜無憾可忍羈覓似粵阡

送盧叔賢之鄧州

萬里風雲入壯懷斗南人已識奇材重看綠水開蓮幕

宛勝黃金築隗臺鈴閣風清談麈靜星旄煙暖漢旗開
後期竚聽平安報定逐梅花驛騎來

壽王子初

彩鳳高翔欲覽輝十年書史董生帷持心不為紛華奪
尚友常先遠大期內富經綸隆事業外涵風雅養詩脾
赤霄玄圃春風信百歲相期拾紫芝

自適

旋收柏實炷爐薰紙帳低垂自有春竹几隱眠無俗夢

蒲團容膝勝華裯
窻間白日驚濤迅
門外黃塵萬事新
幸與聖賢相晤語
未辭藜藿此生貧

登熙春閣

封丘門外故宮傍
天閣空餘內苑荒
瀛海夢空三島沒
帝城烟慘五雲蒼
石鱷照水鱗猶動
金鳳凌雲勢欲翔
竒貨梁園當日盡
為誰留住閱興亡

哀故宮

掖庭依約粉垣丹
行入荒宮重黯然
華表忽驚人世換

昆明重見劫灰寒石龍委地理秋草湖玉臨池倚暮烟
滿目悲風吹酒醒東華門外淚闌干

送趙相君北上

漢祚當年入汴州布衣曾此識君侯夏盟自列葵丘會
驥馬空騰瀚海秋萬里風雲橫寶玦九天名姓動金甌
南遊正值朝天去望斷春風五鳳樓

登凌雲閣

布衣塵滿戴儒冠風袂來登上將壇棟藻雲飛朱拱溼

簷牙霜重玉梯寒風煙遠勝籌邊迥氣勢雄吞汗水乾
經畧江淮有成筭不須重展地圖看

送王子初之鄧州

東風霽雨泛晴光桃李爭妍出短牆春意似留行客住
陌城多釀燕泥香三盃別酒清明後滿眼春愁錦瑟傍
一曲劔歌心事遠綠波南浦未應傷

送郝伯常歸堡塞

書劔南辭祀國天一歡傾倒酒壚邊鳳麟瑞質驚千古

江海詞源浩百川吾道莫傷今日否
新文將付後來傳
驪駒歌斷青山暮愧未嘗遊從馬遷

贈李幹臣

少年心事便拏雲不著清談解世紛
自得士元參別駕
強推伯比具張軍一江夜雨供吟筆
萬里征鞍逐雁羣
蚤晚春風笳鼓地更看詩壘策奇勲

登資聖閣

傑閣當年瑞靄氤亂餘金碧半塵昏
豈知象教移中土

猶揭雄名護國門
法界冷沈梁苑月
寶香難返汝陽魂
傷心五嶺騰烟語
舉世從風莫與論

跋西蒲老人燕處圖

甫脫孤城百戰危
蒼茫何處跨鯨歸
百年有感悲風樹
一旦無依足孝思
遺像儼然留故事
寸心聊擬答春暉
遠游剩袖如瓜棗
海岳相逢會有期

上史相君壽

麟閣勲高誓不磨
戟門春靜雀堪羅
盟高踐土尊王切

恩義河南受賜多好學世推同杜預薦賢人道過常何
稱觴何限與人頌細逐春風入凱歌

過楚卿子冠軍宋義墓

乙卯春三月予東如大名道出內黃鎮有廟在民居
之南曰項王廟廟之址即卿子冠軍宋義墓也且以
往昔墟墓間恍惚事來告予甚鄙焉獨於義之死有
所感焉噫義竒士也初武信君舉兵渡淮而西城攻野
戰勢若破竹義之力居多及師入定陶再戰而再勝

也見梁志滿氣驕識其奪魄後值奔潰果不踰素義
可謂深知兵矣至羽請師救趙執以不可觀其籌畫
號令攻取先後之方誠上將之畧惜不使差肩三傑
北面以事高祖反區區委贄天久厭之楚與羽並驅
爭先西向以舉虎狼之秦何其不幸者哉雖然方秦
之失鹿也羣雄蝟起以蛇為龍者不可勝計布衣皇
皇之士能明目識帝王之真而歸之者蓋有之矣誠
未易一二數也至若淮陰韓信陽武陳平一旦起而

盡為楚用初且不知天命集漢而後卒歸於漢功業
如此幸也嗚呼使天假義年晚脫身項氏杖策以歸
真主其功名當代縱不能廁三傑之列未至與噲等
伍耳嗚呼義何不幸也哉義何不遇也哉因作詩以
弔并著予之感云

老項捐軍勢已孤
擣秦遺趙見雄圖
奇才惜不遭龍準
赤手爭教捋虎鬚
日月不為荆楚計
干戈空為漢家毆
因君重起無依歎
羨煞中林得止烏

元齋

生平襟度玉無瑕
天馬精神出渥洼
北海罇壘無暇日
德公賓主到通家
山高仰止人皆慕
齋用元名意匪誇
教子以經平日事
不應遺實取其華

過朝歌

山勢西來擁廢宮
荒煙回首接南廊
緬懷藝祖初經野
忍見狂童到覆宗
野水作聲知客恨
幽花含露為誰容
千年快意商郊戰
流謗爭教有闕亮

銅臺懷古

都邑盤盤據四衝，登臨形勢覺天雄。
歌樓聲響春風細，綺陌香銷寶氣空。
笑看孱王承宋弊，至今奸孽擅唐終。
憑高誰識神州恨，付與衡漳日夜東。

佑德觀早起留別道人陳彥達

碧桃花露溼衣涼，宿酒醒時夜未央。
浩浩市聲喧曉枕，摇摇星影入虛堂。
春風醉袖愁分手，秋雨吟燈約對床。
後夜月明東北路，呂安歸夢半嵇康。

望東北方書半
空嵇康字兩行

寄蕭茂先

飄蕭襟韻恥咿嚶
醉裏青衫兩鬢秋
通介不隨流俗變
清貧當向古人求
城居貴似玉川子
鄉思空懷馬少游
早晚臨漪亭畔月
一尊重為紫髯留

晚菊

竹瘦松枯怨歲寒
為誰含露發幽妍
早花儘秀開何益
晚節能昌固自賢
採擷落英悲楚客
破除秋色靜斜川
不辭潦倒東籬下
桃李成蹊世舉然

聞詔

灑水嵩呼萬歲觴
綸章飛下紫泥香
九天空有風雲夢
萬國爭依日月光
草木變哀元氣活
乾坤開霽老陰藏
兩都耆舊欣相告
四十年來未省嘗

陽穀道中有懷黃石公事寄呈敬齋姚公

雪齋請益初心在
東郡趨庭宿願償
黃石有書開帝業
布衣無地著恩光
自慚國士思圖報
敢暴孤懷不自強
巾卷在庭循誘際
佩懷言行愈難忘

趙御史挽章

振藻儒林起趙宗殿前一賦已摩空
筆參造化陽冰篆氣屏權豪御史驄
養老正期來祝哽招魂何意入新宮
影堂一拜情蕭慘瑞露香殘翠竹風

上王翰林

白衣如鵝禁闈春九萬曾搏北海鯤
獨翼龍顏潛代邸親承雲錦織天孫
兩朝耆德尊元老千古雄文說赦恩
寂寞黃金臺下客詠歸心久在龍門

夢受庭訓其中領頤二聯蓋先君之意云

落月驚風夜色蒼
羈魂明墮几筵傍
音容恍對如生在
教戒無多止義方
芟歎似傷時祭闕
松楸應念墓田荒
牽衣未畢城烏起
晚枕縱橫泪幾行

贈孟文伯

秋月堂深劒履寒
相逢一語破春顏
心君意豁驚囊穎
豹體文竒見霧斑
孤節共高殷侑壯
片言誰拔子卿還
笑拋燭影金釵夢
長繞天墀十二間

壽姚宣撫

咸池朝日覩離明羽翼功高見老成相體共推安石雅
襟期全得伯夷清黃金眼冷燕臺望赤羽心馳魏闕情
鄭重一杯千歲酒調元消息在新正

周仲寅處覓貂帽

炙手權門已強顏蒯緱未免向人彈晨鐘聲裏霜侵鬢
蘭省臺邊雪滿鞍貂帽擬從公子覓客牀應念廣文寒
何當花影烏衫側一笑春風拍畫闌

邢夫人拜慶詩軸

對君如讀開元報
歷歷聲明見典刑
款曲每憐名父子
顧瞻疑是老人星
一言楚獄陰功厚
百世名談汗簡青
濱海歸來非我志
春江乘興看浮萍

鎮州懷古

趙武雄圖不可尋
風煙東接九門深
炎涼到此分南北
戰伐無情自古今
彈躡流風猶戰國
椎埋遺俗帶燕音
劍歌不遇平原客
落日滹沱動旅吟

祇謁昭烈皇帝廟

一劍功成百戰場三年章武事堪傷
力扶漢祚圖燃燼規取劉璋出侮亡
若論託孤徒啟篡試評含泣到分香
秋風一掬宗臣血五丈原頭落日蒼

燕城書事二首

都會盤盤控北垂當年宮闕五雲飛
崢嶸寶氣沉箕尾慘淡陰風貯朔威
審勢有人觀督亢封章無地論王畿
荒寒照破龍山月依舊中原半落暉

朔風千里捲孤蓬
斗酒難澆磊胸清濁滄浪知自取
蒙茸狐服竟誰從
燕臺坐老黃金客
甲第爭高白玉鍾
撥土便成千尺榦
露恩初不負崑松

望西陵

漳川北岸望西陵
馳道東連講武城
將畧有餘開戰伐
墓碑無謂自題評
一棺何在彌天力
九錫徒誇盜漢名
千古遺墟冷烟底
定軍山樹拂雲平

牧野道中

野人川洛振裳衣，況接恩波沐鳳池。莫訝出門何刺刺，
須知去國自遲遲。河橋飲餞無千騎，文物聲明又一時。
有淚不揮離別際，西風空送雁行悲。

奉送平章趙公赴闕庭之召，少答省檄見招之
意云

龍旆南還沸捷音，漢臺凝望幾登臨。洗兵未用挽天漢，
入夢應知有傅霖。暖日晴消青海雪，春風重掃黑山陰。
君王若問來歸策，為說虞皇待象心。

贈鄉先生韓義和

草服黃冠玉練顏一壺天地市朝間
飄飄野鶴雖無繫戀戀鄉情尚未慳
幽睡不妨紅日晚青山誰似白雲閒
何當一劍飛空去好為留題過故關

送常道人子明

道士何心作羽流
擇音應避物為仇
冷風身世三千界
碧落仙居十二樓
無地可留雲表鳥
有懷終結竹林遊
因君喚起西遊興
滿眼太行黃落秋

送劉同知還鎮陽

繼士
觀韻

幾人襟韻似君侯
潘岳閒居賦遠遊
白雪高歌南郢重
壽山長路太行秋
隱居正有千林玉
濯足何須萬里流
一曲驪駒頓丘北
碧雲零落使人愁

為王朝顯贈梁邦傑兼簡郝勸農

漳南客子王朝顯
日暮塗窮仗友生
今夜遠披回沁水
傍冬索米入共城
千金諾重河東守
一府蓮香白壁卿
詩豪不須詢幾束
溪聲山色總闌情

和幹臣今晨所見

庚金乘火勢相高一夜秋風散鬱陶氣錯不調伊摯鼎
雨凍空續楚臣騷人占樂歲無遺慮我覺天刑未可逃
除治菊荒還寓目青山城郭九回遭

大風

六合塵沙一混同羣龍無力障驚風早乾到此誰歸咎
天道從中見蔽蒙詩枕夢驚茅屋破山林春老綠陰空
雄文便擬昌黎訟九虎當閣未易通

雨後草堂即事

駭浪崩騰點額餘，歸來縮首伴沈魚。
門從席後軒車少，鬢自蒼來酒琖疎。
坐掩殘書懷苦節，自鋤明月種秋蔬。
鄰人共指揚雄宅，只有兒童來喚烏。

挽李子文

一丘宿草縣城東，前日花時杖履同。
白壁不埋連邑價，青燈空負十年功。
鵬來近舍傷君去，麟出非時見道窮。
修短偶然吾適值，不須作賦問天公。

初從拱把見凌雲天意栽培似厚君大厦如傾梁棟在
神交遽爾歿生分白駒空谷歸何處夜雨他年不忍聞
吾道已窮來者替兩行清淚為斯文

絳帳絃歌日沸闌去煩從簡屢為言自春卧病無三月
一歿埋魂入九原桂實未霜驚早落烏聲解語惜空喧
東門最是傷心地老父哀號血洒轅

五年六月初八日夜夢遺山先生指授文格覺
而賦之以紀其異

分明昨夜夢遺山指授文衡履約間道必細論能出理
丈徒剽竊亦何顏江流不廢驚千古霧管時窺得一斑
落月滿梁清境覺紫桐花露溼銀冠

夏日南堂即事

一雨清涼恰四朝霧絲縈戶見蠨蛸病因戒酒成真止
辭免書門絕妄交道拙尚憂兒墜簡家貧且喜稼盈郊
閒庭綠蘚泥融遍燕子飛來補舊巢

同幹臣讀漳濱唱和詩軸

草堂舊雨記相尋細嚼漳濱唱和吟白雪調高雖寡和
朱絃聲邈有遺音犀寒蒼渚竒逾出氣奪元胎理更深
一洗向來箏笛耳坐聽三峽瀉瑤琴

高山仰止為千尋更對佳人與細吟藝絕六鈞俱破的
調高千古得知音靜藏脫兔無窮變法比滄溟不自深
客去洒然心境寂滿軒秋氣入絲琴

謝人惠瓦甌

老雨崩崖為爾開野人攜贈入芸齋埏陶有意成三代

奠獻曾經備兩階上擁圓吭躄野鶴中橫皤腹怒池蛙
鈎深免汝居危地時插秋香慰老懷

六月初七日夜雷雨大作

落日山雲擁蓋幢二更雷起雨翻江六丁怒瀉銀河水
千杖齊敲羯鼓腔耕墾握苗秋有望炎官收傘夜深降
一犁聞說西江上蚤晚龍移似老龐

和幹臣韻

雲漏疎星不滿天坐來風雨黯西山百憂鯨鬣翻滄海

一喜涼颺入白閒
蜚不成災休紀異
暑雖初伏暫知還
雨傷旱損俱咨怨
讀罷君詩一破顏

雨後出門言懷


壯年抵歿別猶薰
老去收藏省一身
祿不妄干時有待
道從深探理彌真
充腸有蔣固云苦
舉目無塵可污人
洗我胸襟閒塊磊
門前秋水碧粼粼

萬書叢裏自陶薰
浩浩堪興寄一身
樹靜蟄坯存夜氣
鳥飛魚泳見天真
學從踐履安天命
世要經綸有若人

林下幼安應未老且教雙足濯鄰鄰

和幹臣雨晴出郭之什

飲散公庭樂亦陶西河乘興喜同遊
河神偃蹇誇秋水山翠空濛上鬢毛
乍脫城居驚眼放縱教詩思與秋高
鴻飛燕集隨時處誰羨傭耕隴上豪



秋澗集卷十四